

31 JUL 2004

Mahathir-Ijazah

TUN DR MAHATHIR AKAN TERIMA IJAZAH KEHORMAT DOKTOR SAINS DARI USM

PULAU PINANG, 31 Julai (Bernama) -- Bekas Perdana Menteri Tun Dr Mahathir Mohamad akan dianugerahkan Ijazah Kehormat Doktor Sains pada sidang pertama Konvokesyen ke-33 Universiti Sains Malaysia (USM), pada Rabu ini.

Naib Canselor USM Prof Datuk Dzulkifli Abdul Razak berkata, Dr Mahathir akan menerima ijazah itu daripada Canselor USM, Raja Permaisuri Agong Tuanku Fauziah Tengku Abdul Rashid.

Penyampaian ijazah kehormat itu merupakan pengiktirafan universiti itu terhadap sumbangan Dr Mahathir dalam bidang sains dan teknologi di negara ini.

Ketika bercakap pada sidang berita di sini, hari ini, Dzulkifli berkata Dr Mahathir juga merupakan pencetus semangat "Malaysia Boleh" di kalangan penduduk di negara ini dan semangat itu terbukti berjaya mengharumkan nama Malaysia di peringkat antarabangsa.

Selain itu, katanya, pameran khas 60 koleksi peribadi potret Dr Mahathir juga akan diadakan Galeri Adiwarna, di sini sempena konvokesyen selama empat hari itu.

Dzulkifli berkata, pada pameran potret itu, Tuanku Canselor juga akan melancarkan buku terbaru terbitan USM bertajuk "Mahathir on Science and Technology" .

Katanya, buku edisi terhad, yang menghimpunkan ucapan-ucapan Dr Mahathir mengenai sains dan teknologi sejak awal penglibatannya sebagai pemimpin negara itu, dicetak sebanyak 500 naskah.

Selain itu, USM juga mengeluarkan buku berkaitan sejarah universiti itu sejak ia dibuka kira-kira 35 tahun lalu oleh Perdana Menteri yang pertama Tunku Abdul Rahman Putra Alhaj berjudul "35 Years USM 1969-2004" dan orang ramai boleh mendapatkannya sempena konvokesyen itu.

Dzulkifli berkata, pelbagai acara diatur untuk ekspu konvokesyen dan Hari Terbuka USM antaranya pertandingan Lagu Keroncong, Forum

Perdana Hal

Ehwal Islam, kembara harta karun Malam Seni Budaya serta gerai-gerai pameran dan jualan.

Pada konvokesyen kali ke-33 ini, sebanyak 6,355 orang graduan akan menerima ijazah masing-masing pada konvokesyen kali ini dan daripada jumlah itu 293 orang menerimanya pada sidang pertama.

-- BERNAMA

NHA ZU PR